

Visoki predstavnik poziva na brzo donošenje Zakona o sistemu indirektnog oporezivanja

Komisija za politiku indirektnog oporezivanja (Komisija) je završila nacrt Zakona o sistemu indirektnog oporezivanja u Bosni i Hercegovini u vremenskom roku koji je odredio visoki predstavnik u februaru kada je uspostavio Komisiju. Nacrt Zakona omogućava Upravi za indirektno oporezivanje (Uprava) da upravlja carinama i na kraju porezom na dodatu vrijednost u okviru jedinstvenog i efikasnog sistema u skladu sa evropskim zahtjevima.

“Ovim se krči put sistemu za prikupljanje prihoda koji će eliminisati sistemsku korupciju i nepoštenu konkurenciju koje su ljudima ove zemlje oduzele stotine miliona KM”, rekao je visoki predstavnik na konferenciji za medije koja je održana da bi se objavio uspješan završetak rada Komisije. “Istovremeno, na ovaj način će se očuvati fiskalna odgovornost države i entiteta uspostavljanjem Upravnog odbora i zaštititi makroekonomska stabilnost BiH u cjelini.”

Sjedište Uprave za indirektno oporezivanje će biti u Banjaluci. Broj postojećih carinskih ispostava će biti smanjen sa devetnaest na četiri koje će biti organizovane u skladu sa potrebom za jedinstvenim ekonomskim prostorom i ekonomskom efikasnošću. Ispostave će biti smještene u Sarajevu, Mostaru, Banjaluci i Brčkom. Završeni zakon će sada biti dostavljen Vijeću ministara koji će ga onda uputiti u BiH Parlament. Entiteti će također imati priliku da daju komentare o novom sistemu.

Komentarišući dogovor da sjedište Uprave bude u Banjaluci,

visoki predstavnik je pozdravio javnu opredjeljenost premijera Mikerevića da će Vlada RS poduzeti sve neophodne korake da bi obezbjedila za Upravu radno okruženje u kojem nema korupcije, kao i da ponašanje carinskih službenika bude besprijekorno.

Visoki predstavnik je rekao da će usvajanje nacrtu zakona u Parlamentu:

- koristiti građanima
- označiti kraj one vrste korupcije u kojoj su nepošteni političari i njihovi pomagači bili suviše dugo upleteni
- uskladiti bh. poreski i carinski sistem sa evropskim; i
- predstavljati veliki korak prema članstvu BiH u Evropi.

“Dozvolite mi da naglasim da za uspjeh ovog zakonodavnog rada nije zaslužna Međunarodna zajednica, već građani BiH”, rekao je visoki predstavnik. “Oni koji su radili na ovom zakonu i dogovorili se o njemu pružili su BiH mogućnost novog početka i veliku priliku za budućnost. Sada je na vlastima da osiguraju da ova prilika ne bude propuštena, nego da se pretvori u sigurne korake u bolju budućnost za bh. građane i u veliki korak na putu u Evropu.”